

四庫全書

子部

欽定四庫全書

子部

藝文類聚卷

甲子九

詳校官中書

臣李彤

員外郎

臣牛綸文履勘

總校官知縣

臣楊懋珩

校對官編修

臣沈清藻

謄錄監生

臣儲夏書

欽定四庫全書

藝文類聚卷四十九

唐 歐陽詢 撰

職官部五

太常司農

衛尉將作

太僕光祿

大夫廷尉

鴻臚太子詹事

太子中庶子太子舍人

太常

尚書曰伯夷秩宗典朕三禮

周官曰春官宗伯掌天地神祇

漢書曰太常秦官掌宗廟禮儀

漢官典職曰惠帝改太常為奉常景帝復太常蓋周官宗伯也

漢書解詁曰太常掌社稷郊時事重職尊故在九卿之首衛宏古文官書曰太常主導贊助祭皆平冕七旒玄上纁下畫華蟲七章漢陵屬三輔太常月一行

史記曰叔孫通為奉常賜金五百斤通因進言曰諸弟子儒生隨臣久矣與共為儀願陛下官之高帝悉以為郎通出皆以五百金賜諸生諸生曰叔孫生聖人也知

當世務

漢書曰武帝元鼎二年廣安侯任越人為太常坐廟酒
醉論又曰武帝元封四年鄼侯蕭壽成為太常坐犧牲
不如令論又曰孝武帝元朔元年孔臧為太常坐南陵
橋壞衣冠道絕免

續漢書曰太常卿每祭祀先奏其禮儀及行事賞罰天
子每選試博士奏其能否

華嶠後漢書曰劉愷為太常論議常引正大義諸儒為

之語曰難經伉伉劉太常

東觀漢記曰桓榮為太常上幸太常府榮東面坐設几會賓子郁以明經復為太常

應劭漢官儀曰周澤為太常齋有疾其妻憐其年老被病闕內問之澤大怒以為干齋掾史爭之不聽遂收送詔獄并自劾謝論者譏其激發不實又諺曰居世不諧為太常妻一歲三百六十日三百五十九日齋一日不齋醉如泥既作事復低迷

益部耆舊傳曰趙典為太常雖身處上卿而布被瓦器
齊職儀曰太常卿一人品第三秩中二千石銀章青綬
進賢兩梁冠絳朝服佩水蒼玉王朗云西京太常行陵
赤車千乘

贊晉潘岳故太常任府君畫贊曰堂堂我君鑒象開慶
逸德宣猷含真履素味道無悶守終純固弓與爰集撫
翼清舉翰飛公庭龍升天路初掌萬國流化千里遂管
秘籍辯章舊史入登常伯出作卿士外內惟允庶績咸

理中節日新令問不已濟濟儒林翼翼國子

晉孫綽太常碑贊曰海岱協靈育此多士峩峩君侯東國之紀金德發耀英風劬起文齊游夏行儔魯史有邈其升令問不已人亦有言德崇譽高東帛旣言旌節仍招儀刑朝堂流風丹青將振華袞永煥皇朝上帝靡盬曾不遐齡衛霍頽鎮哲人其傾邦國殄瘁搢紳喪情仰拜高範永播休聲

歲漢揚雄太常箴曰翼翼太常寔為宗伯穆穆靈祗寢

廟奕奕稱秩元祀班于羣神我祀既祇我塗孔蠲匪愆匪忒
公尸攸宜無曰我材輕身恃筮東鄰之犧牛不如西鄰之麥
魚秦殞望夷隱斃鍾巫常臣司宗敢告執書

墓誌梁元帝太常卿陸倕墓誌銘曰如金有鑛如竹有筠體二方擬知十可鄰兩升鳳詔三侍龍樓南皮朝宴
西園夜遊詞峯颺豎逸氣雲浮日往月來暑流寒襲東
耀方遠北芒已及墜露曉團悲風暮急

梁沈約太常卿任昉墓誌銘曰天才俊逸文雅弘備心

為學府辭同錦肆含華振藻鬱焉高致川谿望歸岩阿
待闕幽光忽斷窮燈黯滅爾有令問蘭薰無絕

表梁陸倕為王光祿轉太常讓表曰昔者楚德方盛孫
叔濯衣漢道克隆王陽結綬故拜命無辭受爵不讓况
宗卿清重歷選所難漢晉以降莫非素範辭爵則桓郁張奮
讓封則丁鴻劉愷潘尼之文雅深純華表之從容退默
自此迄茲風流繼軌以臣况之曾無等級

陳沈炯為周弘讓太常表曰臣聞玉為彫楹不數材於

蟠木丹成繡黼豳襲冕於蘿薜何則適用各有所宜朝
野不可一指叔孫之分定禮儀倍資典實刁協之躬為
唱引豈易其儀賓主闕對封禪失儀責以司存云誰之
咎況南史執簡轉見違才君舉必書尤輕妄冒

傅梁王僧孺太常敬子任府君傳曰恥一物之不知惜
寸陰之徒靡下帷閉戶投斧懸梁雖玄晏書淫文勝經
溢康成之忽忘所往公叔之顛墜研岸無以異也若夫
天才卓爾動稱絕妙辭賦極其清深筆記尤盡典實若

聞金石似注河海少孺速而未工長卿工而未速孟堅
辭不逮理平子意不及文孔璋傷於健仲宣病於弱其
有集論尚書窮文質之敏駐馬停信極疊疊之功莫尚
於斯焉君職等曹張聲高左陸時乃高闕雪宮廣開雲
殿秋窻春戶冬燠夏清九醞斯浮百羞竝薦雲銷月朗
聿茲遊客朋來旅見辭人才子辯圃學林莫不含毫咀
思爭高競敏乃整袂端襟翰飛紙落豪人貴仕先達後
進莫不心服貌慚神氣將索顧余不敏廁夫君子之末

可稱冥契是為神交二三君子唯以從游日暮亭號昭
仁庶子雲咫尺康成斯在借此嘉言將無絕乎千載

衛尉

漢書曰衛尉秦官掌宮門衛屯兵景帝初更名中大夫令
後元年復為衛尉

漢官解詁曰衛尉主宮闕之內衛寺於垣下為廬各有
負部凡居宮中者皆施籍於掖門案其姓名若有醫巫僮
人當入者本官長吏為封啓傳審其印信然後內之人

未定又有籍皆復有符符用木長二寸以當所屬官兩字為鐵印亦太卿炙符當出入者案籍畢復齒符乃引內之也其有官位得出入者令執御之官傳呼前後以相通從昏至晨分部行夜夜有行者輒前曰誰誰若此不解終歲更始所以重慎宿衛也

東觀漢記曰光武二十三年太尉鮑昱兼衛尉永元二年司徒丁鴻兼衛尉

魏志曰辛毗為衛尉清貧與徐邈胡質皆憂國忘私不

營產業賜穀二千斛錢三十萬布告天下又曰田豫為
并州刺史徵為衛尉屢乞遜位司馬宣王以豫克壯書
喻未聽豫書荅曰年過七十而以居位譬猶鍾鳴漏盡
夜行不休是罪人也遂引疾拜太中大夫

沈約宋書曰南郡王義宣子恢為侍中領衛尉晉氏過
江不置衛尉世祖欲重城禁故復置衛尉自恢始也

箴漢楊雄衛尉箴曰茫茫上天崇高其居設置山險畫
為防禦重垠累垓以難不律闕為城衛以待暴卒國有

以固民有以內各保其守永修不敗

碑後漢孔融衛尉張儉碑銘曰其先張仲實以孝友左
右周室晉主夏盟而張老延君譽於四方君稟乾綱之
正性蹈高世之殊軌冰潔淵清介然特立雖史魚之勵
操叔向之正色未足比焉中常侍同郡侯覽專權王命
豺虎肆虐威震天下君以西都督郵上覽禍亂凶國之
罪鞠沒賊姦以巨萬計俄而制書案驗部黨君為覽所
陷亦章名捕逐當世英雄受命殞身以籍濟君厄者蓋

數十人故克免斯艱旋宅舊宇衆庶懷其德王公慕其
聲州宰爭命辟大將軍幕府公車特就家拜少府皆不
就也復以衛尉徵明詔嚴切勅州郡乃不得已而就之
銘曰桓桓我君應天淑靈皓素其質允迪忠貞肆志直
道進不為榮赴戟驕臣發如雷霆凌剛摧堅視危如寧

太僕

漢書百官表曰太僕掌輿馬屬官有大廐未央廐家馬三令又
車府路軫騎馬駿馬四令丞又龍馬閑駒橐泉駒餘承華五

監長丞又邊郡六牧師苑令各三丞又牧索昆蹄令丞皆屬焉武帝太初元年更名家馬為酏馬注乳馬取其汁捫治之味酢可飲因以名官也

文類曰所主捫酏雜合非上選所別異之馬也酏音洞主乳馬韋革為夾兜受數升盛馬乳捫取其上肥因名酏馬今梁州亦名馬酪為馬酒

漢舊儀曰太僕牧師諸苑三十六所分布北邊以郎為苑監官奴婢三萬人分養馬三十萬頭擇取給六廐牛羊

無數以給犧牲

漢書曰夏侯嬰自上初起沛常為太僕竟高祖世以太僕事惠帝惠帝崩以太僕事高后高后崩代王之來嬰與東牟侯入清宮以天子駕迎代王共立文帝後為太僕東觀漢記曰祭彤字次孫旅力過人嘗貫三百斤弓入為太僕從至魯明帝指子路室曰此太僕室也

續漢書曰趙岐字臺卿獻帝以為太僕持節安慰天下王隱晉書曰武帝以羊琇為太僕卿遜位加特進

晉諸公贊曰郭展為太僕留心於養生是以廐馬充多
其後征吳得以濟事

帝王世紀曰穆王即位命伯冏為太僕今尚書君牙伯
冏二篇是也

箴漢揚雄太僕箴曰肅肅太僕車馬是供鏘鏘和鸞駕
彼時龍昔在上帝巡狩四宅王用三驅前禽是失廐多
肥馬野有餓殍僕臣司駕敢告執皂

誄晉傅玄永寧太僕龐侯誄曰蒸蒸孝敬行著閨庭如

蘭之芳如金之貞在亂不回處暗斯明仁象春日威配
秋霜慈恩雨施惠化風揚嘉善獻親疾惡若讎品定人
倫清濁異流將繼四祖世據削定天假其年主優其祿
等勲伊呂比壽東嶽

廷尉

韋昭辯釋名曰廷尉縣尉皆古官也尉以尉民心也

尚書曰帝曰臯陶蠻夷猾夏寇賊姦宄汝作士

文子曰臯陶暗而為大理天下無虐刑有貴乎言者也

韓詩外傳曰晉文公使李離為大理過聽殺人自拘廷尉請死於君君曰官有貴賤罰有輕重下吏有罪非子之罪也李離曰法失則刑刑失則死遂伏劍死

漢書曰廷尉秦官掌刑辟有正左右監景帝中元六年更名大理武帝建元四年復廷尉又曰下邳翟公為廷尉賓客填門及罷門外可設雀羅後復為廷尉乃署其門曰一死一生乃知交情一貴一賤交情乃見一貧一富乃知交態又曰張釋之為廷尉上行出中渭橋有一人

從橋下走乘輿馬驚於是使騎捕之屬廷尉釋之秦此人犯蹕當罰金上怒釋之曰廷尉天下之平也一傾天下用法皆為之輕重民安得措其手足上良久曰廷尉當是也又曰于定國為廷尉朝廷稱之曰張釋之為廷尉天下無冤民于定國為廷尉民自以不冤又曰朱博遷廷尉恐為官屬所誣召見正監典法掾史謂曰廷尉本起於武吏不通法律然廷尉治郡斷獄以來且二十年亦獨耳剝日久三尺律令人事出其中掾史試與正監

共撰前世決事吏議難知者數十事特以問廷尉得為
諸君意覆之正監即共條白博博皆召掾史為平處其
輕重十中八九官屬咸服又曰文帝初立河間守吳公
治天下第一故與李斯同邑乃徵吳公為廷尉

華嶠後漢書曰河間吳雄以明法律桓帝時自廷尉致
位司徒雄子訢孫恭三世為廷尉以法為名家又曰郭
躬為廷尉正遷廷尉家世掌法凡郭氏為廷尉者七人
新序曰楚昭王有士曰石奢公正而好義王使為理於

是廷尉有殺人者石奢追之則其父也及於廷尉曰以父成政不孝也不行君法不忠也弛罪法而伏其辜僕之所守也君曰庸有罪乎子其治事矣石奢曰不私其父非孝也不行君法非忠也臣不敢失法下之行也遂不離斧鑕刎頸而死

東觀漢記曰永平六年以廷尉皆曹吏強為廷尉以明用達法理超遷非次又曰陳寵為廷尉有疑獄輒手筆作議所活者甚多

魏志曰高文惠明帝時為廷尉時法甚峻而宜陽典農
劉龜竊於禁內射兔收龜付獄文惠表請告者曰廷尉
天下平也安得以至尊喜怒而毀法乎

會稽典錄曰盛吉拜廷尉吉性多仁恩務在哀矜每至
冬月罪囚當斷其妻執燭吉手丹筆夫妻相向垂泣
摯虞新禮議曰故事祀臯陶於廷尉寺新禮移祀於律
寺以同祭先聖於太學也又故事祀以社日新禮改以
孟秋之月以應秋政臣虞謹按臯陶作士惟明克允國

重其功人思其當是以獄官祀其神繫者致其祭律非
正署廢興無常宜如舊禮

晉中興書曰王彪之遷廷尉時揚州刺史殷浩劾永嘉
太守謝毅付廷尉彪之執法不受發詔彪之又上疏執
據時人云張釋之以來復見斯事

箴漢揚雄廷尉箴曰天降五刑惟夏之績亂茲平民不
回不僻昔在蚩尤爰作淫刑延于苗民夏氏不寧穆王
耄荒甫侯伊謀周輕其制秦繁其辜故有國者無云何

謂是則是劓無云何害是剝是割殷以刑顛秦以酷敗
獄臣司理敢告執謁

鴻臚

韋昭辯釋名曰腹前肥者曰臚此主王侯及蕃國言以
京師為心體王侯外國為腹臚以養之也辯云鴻臚本
故典客掌禮鴻大也臚陳序也欲大以禮陳序賓客
漢書曰典客秦官掌諸侯歸義蠻夷景帝六年更名大
行令武帝太初元年更名大鴻臚

漢雜事曰蕭由為陳留太守入為鴻臚卿不任賓贊乃還官

東觀漢記曰大鴻臚漢舊官建武元年復置屬官有治禮員三十七人主齋祠賓贊又有中都官升食以下功次相輔

續漢書曰大鴻臚卿一人中二千石諸王入朝當郊迎典其禮儀及郡國上計并屬焉皇子拜王贊授及拜諸侯諸侯嗣子四方夷狄封者鴻臚召拜之

魏略曰常林性既清白當入官又嚴少府寺與鴻臚對門時崔林為鴻臚性闊達不與林同數數聞林過人吏聲不以為可林嘗夜過吏吏不勝其痛囁呼嗷嗷其明崔出門與林語曰聞卿為廷尉爾耶林不覺荅曰不也崔曰卿不為廷尉昨夜何故考囚乎林慚笑又曰韓宣明帝時為大鴻臚始南陽韓暨以宿德在宣前為大鴻臚鴻臚中為之語曰大鴻臚小鴻臚前後治行曷相如襄陽耆舊傳曰習郁為侍中時從光武幸黎丘與帝通

夢見蘇山神光武嘉之拜大鴻臚錄其前後功封襄陽侯使立蘇嶺祠刻二石鹿夾神道百姓謂之鹿門廟或呼蘇嶺山為鹿門山

山濤啓事曰鴻臚職主故事前後給之率多不善今當選御史丞刁攸舊人不審於宜爾不

箴漢揚雄大鴻臚箴曰蕩蕩唐虞經通陔極畫為上下該羅百職文不可武武不可文大小上下不可奪倫鴻臣司爵敢告在鄰

碑漢邯鄲鴻臚鍾紀碑銘曰內苞九德外兼百行川
深淪於不測瞻智應於無方弘裕足以容衆矜嚴足以
正已然後研幾道藝涉覽文學凡前言往行竹帛所載
靡不悉該於穆上德時惟我君固天縱之允鍾厥純命
世作則實紹斯文遭險龍潛抗志浮雲所貴在已樂存
事親雖庭畎畝天子屢聞

司農

漢書曰治粟內史秦官武帝太初元年更名大司農

應劭漢官曰大司農古官也唐虞分命羲和四子敬授
民時高祖受命懲秦之弊與民休息逮到文景國家無
事家給人足京師之錢累百巨萬貫朽而不校太倉之
粟陳陳相因充溢露積腐敗而不食

史記曰韓信歸漢以為治粟內史

漢書曰武帝天漢元年以桑弘羊為大司農置丞數十
部於郡國又曰宣帝地節四年北海太守朱邑以治行
第一入為大司農

東觀漢記曰牟融字子優為大司農性明達稱為名卿
又曰高詡以儒學徵拜大司農在朝以清白方正稱
魏志曰梁習為并州二十餘年政治為天下最乃徵拜
為大司農

沈約宋書曰大司農卿一人稱棄后稷其職也

齊職儀曰司農卿耕藉則掌其禮儀

箴漢楊雄大司農箴曰厥僚后稷實均實贏有無遷易
惟都作程荀施衣食厥民攸生上稽二帝下閱三王什

一而征為民作常遠近貢篚百姓不忘帝王之盛盛在
農殖季周爛熳而東作不勅膏腴不獲庶物竝荒府藏
單虛靡積倉倉

晉張華大司農箴曰在周之季不處政首弃稷弗修不
籍千畝匱神乏祀敗於戎醜嗇臣司農敢告左右

墓誌陳江揔司農陳暄墓誌銘曰其文猷猷其筆縱橫
背碑即誦據馬俄成誹諧見賞調笑忘情兩宮寵官四
主恩榮萬事依息一朝追送疇昔命觴文可吟諷今日

酌酒長悲且慟

誄後漢張衡大司農鮑德誄曰昔君烈祖丕顯奕世敬
叔生牙美管交賴至于中葉種德以邁種德伊何去虛
適叅建旄屯留其茂如林降及我君揔角有聲遺蒙萬
穀寵祿斯丁守約勤學克勞其形濬哲之資日就月成
業業學徒童蒙求我舍厥往著去風卽雅濟濟京河寔
為西魯昔我南都惟帝舊鄉同于郡國殊於表章命親
如公弁冕鳴璜若惟允之實耀其光導以仁惠教以義

方習射矍相饗老虞庠羌髡作虐艱我西鄰君斯整旅
耀武月頻蠢蠢戎虜是懼是震知德者鮮惟君克舉既
厭帝心將處台輔命有不永時不我與天實為之孰其
能禦股肱或毀何痛如之國喪遺愛如何無思

將作

漢書曰將作秦官掌治宮室

應劭漢官曰世祖中興以謁者領其官章帝建初元年
乃置真位次河南尹永元七年大匠應慎上言百郡計

吏觀國之光而舍逆旅崎嶇私館貢篚之物朽濕曝露
昔晉國霸之盟主耳舍諸侯於隸人鄭子產以為大譏
況今四海之大而可無乎和帝嘉納之即創業焉

漢書曰將作大匠馬延年勤苦賜秩二千石

漢舊儀曰將作大匠改作少府景帝中元六年更名也
續漢書曰將作大匠掌木土之工并樹桐梓之類列于

道側

華嶠漢書曰劉寵拜會稽太守除省煩苛徵為將作大

匠有老叟五六人人齎一百錢送寵寵為一人受一文
大錢

魏志曰楊阜為大匠卿治宮室發美女充後庭阜上疏欲省
宮人諸不見幸者乃召御府史問後宮人數吏守舊令對
曰禁密不得宣露阜怒杖吏一百數之曰國家不以九
卿為密反與小吏為密乎帝聞而愈敬憚

汝南先賢傳曰應仲華為將作大匠發擿姦伏除藻飾
割浮費凡所省息七億餘萬

箴漢揚雄將作大匠箴曰侃侃將作經構宮室牆以禦風宇以蔽日寒暑攸除鳥鼠攸去王有宮殿民有宅居昔在帝世茅茨土階夏卑宮觀在彼溝洫桀作瑤臺紂為璇室人力不堪而帝業不卒詩詠宣王由儉改奢春秋譏刺書彼泉臺兩觀雉門而魯以不恢或作長府而閔子以仍

光祿大夫

漢書百官表曰光祿勳屬官有大夫掌論議

漢官解詁曰武帝以中大夫為光祿大夫與博士俱以儒雅之選異宮通職周官所謂聯者也溫故知新率由舊章皆能分明古今辨舊聞者也

漢官儀曰光祿大夫秩比二千石不言屬光祿光祿勲門外特施行馬以旌別之

百官表注曰光祿大夫古官也銀章青綬詩云三事大夫莫不夙夜職掌言議毗亮論道獻可替不贊揚德化漢書曰杜陵王仲翁出入蒼頭廬兒傳呼甚寵又曰元

帝以少傅周堪為光祿大夫秩中二千石領尚書事務
又曰谷永既為大將軍鳳說能實最高由是擢為光祿
大夫

東觀漢記曰張湛為光祿大夫數陳政常乘白馬光武
每有異政輒曰白馬生且復諫矣

魏志曰黃初四年光祿大夫楊彪詔給吏卒門施行馬
樊英別傳曰詔書告南陽太守曰五官中郎將樊英委
榮辭祿不降其節今以英為光祿大夫賜歸家所在縣

穀千斛常以八月致牛一頭酒三斛

表梁邱遲為柳僕射讓光祿表曰竊聞敬孫以規獻為
職彝品常貴飛翠鳴玉升降禁明臣以疢疾豈伊或忝
匪稱其服終朝三褫近取諸身皎日非喻臣之庸薄久
塵物論假以克壯報効無階而嬰離沉痾日月滋甚聖
朝留簪履之舊愍降帷蓋之餘矜榮不徒行事存寵渥
誅魏陳王曹植光祿大夫荀侯誄曰如冰之清如玉之
潔法而不威和而不褻百僚士庶歛歔霑纓機女投杼

農夫輟耕輪結轍而不轉馬悲鳴而倚衡

太子詹事

漢書百官表曰太子詹事掌皇后太子家丞屬諸官皆屬焉成帝鴻嘉三年省詹事屬大長秋

應劭漢官曰詹事秦官詹省也給也秩二千石

漢書曰竇嬰乃太后兄子景帝即位為詹事帝母弟梁孝王太后愛之孝王朝因燕酒酣上曰千秋萬歲後傳位於王嬰引卮進上曰天下高祖之天下父子相傳漢

之約也上何得傳王太后因憎嬰嬰亦薄其官因病免也又曰孔光父霸宣帝時以經授太子為詹事又曰孝哀元壽元年馬宮為詹事又曰漢文以鄭當時為景帝詹事又曰昭帝元鳳中以韋賢為詹事

王珉荅徐邈書曰詹事彈肅一宮如尚書令中丞矣晉公卿禮秩曰太始中立詹事掌宮事

齊職儀曰詹事品第三茂陵書秩二千石銀章紫綬局擬尚書令位視領護將軍

沈約宋書曰詹事一人初領官屬成帝時悉屬少府魏氏更置詹事摠衆職晉初又屬二傳咸寧復置詹事

俗說曰江夷右僕射主上欲用其領詹事語王准卿可覓比例准對曰臣當出外尋訪准後見主上問近所道事卿已得例未准曰謝琰右僕射領詹事琰即謂公之子恐夷非其例事遂不行

表齊孔稚珪讓詹事表曰太子霞騫青殿日光春宮駕紫谷之英振洛笙之響自非器上白雲韻同明月何以

延芳芝苑挿羽瓊條實嬰戚貴於西京陸粵風素於東國伊人之美方曰可舉臣亦何斯而敢叅冒也

梁陸倕除詹事免讓表曰中陽白水徒庇微軀送珥抱薪未聞成績陳席不棄故劍無遺遂宣時髦升降清顯尊官厚秩無因而至陋巷華門鬱成爽塏儲端華重寶異恒司南章馬宮已擇儒雅實嬰許商爰取姻戚自茲已降名器日隆歷選才賢若何叨越也

陳江總謝宮為製讓詹事表曰如攀珠樹徒仰照匣之

輝若踐玉田不知照廡之價芙蓉之水亟奉北園迷迭
之文屬陪南館久降噓枯之旨許賜凌雲之筆清夜讌
斯謂言善戲黃金然諾竝遂殊寵年齊栢寢豈報恩榮
紙罄蘭臺未書悚戴

啓陳江揔除詹事謝宮啟曰庇身修德濫迹端形陳蘿
故葛攀附不涯解角蛻鱗超踰非次方辭璽會覲收渥
澤

太子中庶子

漢書百官表曰太子中庶子如侍中又曰太子太傅屬官有庶子又曰王商涿郡人少為太子中庶子以肅敬敦厚稱

環濟要略曰庶子謂官中諸吏之適子及支庶在版籍者也行其秩叙作其徒役授八次八舍之職以徵候漢書曰歐陽地餘為中庶子授皇太子經元帝即位遷侍中

魏志曰鮑勛為中庶子又曰王昶字文舒為中庶子

文章叙曰應貞晉室為中庶子

晉齊王攸與山濤書曰中庶子東宮顯職加以侍接左右誠宜得篤粹有行檢六人想悉在尊意必允衆望也

晉中興書曰溫嶠拜中庶子在東宮甚見嘉寵僚屬莫與為比數規諫諷議又獻侍臣箴甚有補益太子時起西池樓觀頗多勞費嶠口疏切諫太子納焉

沈約宋書曰中庶子漢置古者世祿卿大夫之子既為副倅謂之國子天子諸侯子必有庶子官以掌教之

墓誌梁簡文帝庶子王規墓誌銘曰玉挺藍田珠潤隋
水價重連城聲同垂棘偶應龍之籥影等威鳳之羽儀
名理超於荀王博洽侔於終賈稍遷侍中佩玉璽於文
昌珥金貂於武帳文雅與綺縠相宣逸氣並雲霞俱遠
副君取敬杜夷時廻晉儲之駕追嗟徐幹亦降魏兩之
書爰發睿辭為銘云爾七略百家三藏九部成誦其心
談天其口勝氣無儔高塵誰偶榮珪掩采靈劍摧鋒宋
郊淪鼎洛水沉鐘玄扉不晝幽夜恒冬

太子舍人

漢書曰文帝使晁錯詣伏生受尚書還拜太子舍人

漢雜事曰鄭當時景帝時為太子舍人每五日沐浴常

置驛馬長安請諸賓客夜以繼日常恐不徧

魏畧曰張茂上便宜擢為太子舍人

山濤啓事曰臣近舉汜源為太子舍人源見稱有德素

久沉滯舉為大臣欲以慰後聞之士

晉諸公贊曰張華博識多聞無物不知盧浮高朗經傳

有美於華起家為太子舍人

墓誌梁簡文帝太子舍人蕭特墓誌銘曰威鳳五色朝
陽千仞孫枝發響將雛流韻馥哉若蘭頌矣懷瑾瑾既
誕子恒乃懽肩銀鈎之巧重世適雋況此臨池蟬輕露
潤丹旒輕飛哀歌徐引壠水春帷山雲晚陣

藝文類聚卷四十九

欽定四庫全書

藝文類聚卷五十

唐 歐陽詢 撰

職官部六

刺史
太守

尹
令長

刺史

漢書曰武帝時田叔以壯勇舉刺三河秦事稱意又云
王尊遷益州刺史先是琅邪王陽為益州刺史行部至
九折坂歎曰奉先人遺體柰何數乘此險後以病去及
尊為刺史至其坂問吏曰此王陽所畏道邪吏對曰是

尊叱其馭曰驅之王陽為孝子王尊為忠臣又曰朱博遷冀州刺史博本武吏不習文法及為刺史行部吏民數百人遮道自言博駐車決遣如神五六百人皆罷去吏驚不意博臨事乃至於此又曰何武為揚州刺史行部必先即學宮見諸生試其誦論得失然後入傳舍問壑田頃畝五穀美惡

司馬彪續漢書曰郭伋拜并州刺史行部至西河美稷有數百小兒各騎竹馬迎伋拜伋問曰兒何自遠來對曰聞

使君到喜故來迎。伋曰苦諸兒復送到郭外。問使君何日當還。伋謂從事計日告之行部。還入美稷。先期一日。伋念負諸兒。即止野須期。乃往。又曰。周舉為并州刺史。太原舊俗。以介子推焚骸有龍忌之禁。輒一月寒食。莫敢煙爨。老小不堪。歲歲多死者。舉既到州。乃作弔書。以置子推之廟。言盛冬去火。殘損人命。非賢者之意。以宣示愚民。使還溫食。又曰。皇甫嵩領冀州牧。奏請一年租賑饑民。民歌之曰。天下亂兮。市為墟。母不保子兮。妻失

夫賴得皇甫兮復安居又曰种暉為益州刺史在職三年宣恩遠夷開曉殊俗岷山雜落皆懷服漢德其白狼槃木諸國並貢前刺史卒後遂絕暉至乃復向化永昌太守鑄黃金為文蛇以獻梁冀暉糾發追捕馳傳上言冀由是銜怒

東觀漢記曰李珣為兗州刺史所種小麥胡蒜悉付從事無所留清約率下席羊皮布被又曰段熲起於徒中為并州刺史有功後徵還京師熲乘輕車介士鼓吹曲

蓋朱旗騎馬殷天蔽日連騎相繼數十里

謝承後漢書曰王閎遷冀州刺史閎性刻不發私書不交豪族賓客號曰王獨坐又曰李燾為青州刺史發璽書於本縣傳舍乘法駕駢駟朱軒就路奏免四郡相百城怖懼悉豫棄官又曰先時交趾屯兵反有司舉賈琮為刺史即移書告示使其安資業百姓歌之曰賈父來晚使我先反今見清平吏不敢飯乃以琮為冀州刺史舊典駟駕垂赤帷裳迎

於州界及琮之部升車言刺史當遠視廣聽糾察美惡
何有反垂帷裳以自掩塞乎乃命御者褰之百城聞風
自然悚震又曰百里嵩為徐州刺史州境遭旱嵩行部
傳車所經甘雨輒注東海金鄉祝其兩縣僻在山間嵩
傳駟不往二縣獨不雨老父干請嵩曲路到二縣入界
即雨又曰巴祗為揚州刺史幘毀壞不復改易以水滲
曝用之處暝暗之中不燃官燭

華陽國志曰趙琰為青州刺史有貴要屬託琰於廳事

前置大器水發書投置水中無有所報又曰郭賀為荊州刺史百姓歌之曰厥德仁明郭喬卿明帝到南陽巡狩賜三公服去檐露冕使百姓見之以彰有德

三輔決錄曰蘇章為冀州刺史行部有故人為清河太守案得其奸贓乃設酒接以溫顏太守喜曰人各有一天我獨有二天章曰今夕蘇孺文與故人歡飲私恩也明日冀州刺史白奏事公法也遂舉正其罪又曰韋康代父為涼州刺史父出止傳舍康入官時人榮之

魏志云劉馥為揚州刺史馥既受命單馬造合肥空城
建立州治貢獻相繼數年恩化大行

晉陽秋曰胡質為荊州刺史子威自洛陽至荊州定省
家貧自驅驢單行見父停十餘日臨歸質賜絹一匹為
道糧威跪曰大人清高不審安得此質曰吾俸祿之餘
故以為汝糧爾晉武帝問威曰卿孰與卿父清威曰臣
不如也帝曰何以為不如威曰臣父清畏人知之臣清
畏人不知之

魏志曰徐邈為涼州刺史進善黜惡風化大行百姓歸心焉西域流通荒戎入貢皆邈勲也又曰田豫護匈奴中郎將領并州刺史胡聞其威名相率來獻州界寧肅百姓懷之又曰陳泰為并州刺史懷柔民夷甚有威惠京邑貴人多寄寶貨因泰市奴婢泰皆挂之於壁不發其封及徵為尚書悉付還之又曰張既為雍州刺史太祖謂既曰還君本州可謂衣繡畫行矣又曰賈逵為豫州刺史其二千石以下阿縱不如法者皆舉奏免之帝

曰達真刺史矣布告天下當以豫州為法

魏略曰裴潛為兗州時嘗作一胡牀及去留以挂壁

王隱晉書曰羊祜都督荊州諸軍事招攜以禮懷遠以德吳人悅服稱為羊公又曰山濤轉為冀州刺史自濤居州甄拔隱屈搜求賢才旌命所加三十餘人皆顯名當世冀州之士於是為盛又曰杜預為鎮南大將軍都督荊州諸軍事南土美而謠之曰後世無叛有杜翁孰識智名與勇功又曰陶侃為都督荊雍益梁四州諸軍

事是時荊州大饑百姓多餓死侃至秋熟輒糴至饑復減價糴之士庶歡悅咸蒙濟賴又曰庾冰為中書監揚州刺史乃心夙夜情存治道賓禮朝賢升擢後進由是朝野注心咸曰賢相又曰庾翼都督江荆益三州刺史制度規模每出於人數年之中軍國充實人情翕然稱其才明由是自河以南皆懷歸附又曰吳隱之為廣州刺史州界有水名貪泉父老云飲此者皆使廉士變貪隱之始踐境先到水所酌而飲因賦詩曰古人云此水一

軟重千金若使夷齊飲終當不易心

曹嘉之晉紀云羊暨為青州刺史暨牛產犢及遷以官舍所生遺之而去

詩梁元帝後臨荊州詩曰擁旄去京縣褰帷辭未央弱冠從王役從容遊豈張不學胡威絹寧挂裴潛牀所冀方留犢行當息飲羊戲蝶時飄粉風花乍落香高欄來蕙氣疎簾度晚光綺錢臨仄宇阿閣繞長廊又示民吏詩曰闕里尚撝謙厲鄉裁知足咨余再分陝少思宜寡

欲霞出浦流紅苔生岸泉綠方令江漢士變為鄒魯俗
又別荊州吏民詩曰玉節居分陝金貂摠上流麾軍時
舉扇作賦且登樓年光徧原隰春色滿汀洲日華三翼
舸風轉七星旂向解青絲纜將移丹桂舟

梁劉孝綽和湘東王理訟詩曰馮翊亂京兆廣漢欲兼
治豈若兼邦牧朱輪褰素帷淮海封畿地雜俗良在茲
禁姦擿銖兩馭黠震豺狸

碑後漢蔡邕荊州刺史庾侯碑曰君資天地之正氣含

太極之純精明潔鮮於白珪貞操厲乎寒松視鑒出於自然英風發乎天骨事親以孝則行侔於曾閔結交以信則契明於黃石溫溫然弘裕虛引落落然高風起世信荆山之良寶靈川之明珠也爰在弱冠英風固以揚於四海矣拜為荊州刺史仗冲靜以臨民施仁義以接物恩惠著於萬里誠信暢於殊俗由是撫亂以治綏擾以靜也帝嘉其功錫以車服方將掃除寇逆清一宇宙廓天步之艱難寧陵夷之屯否

晉潘岳荊州刺史東武戴侯楊使君碑曰君誕保靈和
繼期載德宣哲清朗直道高尚若乃嘉號推賢博愛濟
衆鄉黨服其義而縉紳慕其風于時文后歷數在躬相
國幕府實允華夏九德咸事俊乂在官成君名器納字
叅軍宏略被于南國美化行乎江漢西陵之役懸軍深
入親薄寇壘躬行天誅既而救兵不進糧盡道窮因乃
憮然迴慮殿其衆而返雖為法受黜勲庸未崇而天下
伏其勇世主思其忠

晉潘尼益州刺史楊恭侯碑曰君毓乾靈之醇德挺一世之殊量稟天然不渝之操體蘭石芳堅之質夫其器膺弘濟智能周達窮不怨否顯不矜泰履行則為模楷吐言則成隲括德實充於內而光華發乎外也君發迹州國委質明主自景皇帝攝政文皇帝繼業值天下多虞疆場未靜以君先帝所拔懷寶後時而深達遠識有經國之量故為腹心謀臣而監度政事焉君出則簡練熊羆職司是圖入則從容諷議盡規帷幄其所以進可替

否決疑定策者皆言効於既往而事簡於帝心君再臨
司官三撫名郡方將宣文德以來遠建武功於所牧銘
曰天生蒸民有類有則誕育恭表應期秀特文兼六行
武備七德忠肅弘毅柔嘉溫克機事無瑕臨疑不惑我
謀既精我化既清澤流河朔勲著王庭西南未夷侯其
是寧上天不惠早世潛靈

北齊邢子才冀州刺史封隆之碑曰公世載儒雅之風
家傳鐘鼎之業出三代而克阜歷兩都而轉盛五世祖

游游子孚恥斯鳥獸狹此丘壑濡足焚首念在一匡委
質中山並克袞闕故已援墜拯溺大庇生民祖定功業
建旆懷藩揚旌冀部耳目相接歌詠獨存父司空孝宣
公稟潤玉府承華桂簿望振鷺而齊舉軼歸鴻而竝運
以茲一德光事三主七登九伯之重再處八元之任必
有餘慶事屬才子莫之與京理歸世祿非因原隰之氣
詎待河嶽之靈發純粹而成址稟中和而樹質神體秀
異志識閒爽幼體成人弱不好弄同鳳凰之五色非豫

章之七年太昌初平洛除侍中驃騎大將軍密勿樞功
逶迤袞職貂蟬承升華藻披衣鳴雙璜於峻陛驅六轡
於廣路升華輦以弼一人踐太階而平天下

周王褒故陝州刺史馮章碑曰其先陶唐氏之苗裔堯
少子生而手有馮字因以為氏俾侯于魯義等房心之
地余與之廣事符河汾之邑使君稟靈河嶽比德璵珎
閨門和美譽聖開宗握文命氏濁水北流秦關東徙巖
險襟帶山河枕倚陸離組甲從容青紫

周庾信少保幽州刺史豆盧府君碑曰本姓慕容燕文
帝號之後也其先保姓受氏初存柳城之功開國承家
始靜遼陽之亂尚書府君改姓豆盧筮仕于魏公資忠
履孝蘊義懷仁直幹百尋澄波千頃留心職仕愛翫圖
籍官曹案牘未嘗煩擁戎馬交馳不妨殊俗兄弟公侯
國朝親戚宜春有湯沐之盛濯龍無流水之譏渭南千
畝之竹尚懼盈滿池陽三頃之田常思止足銘曰朝鮮
稱國孤竹為君地稱高柳山名密雲遼陽趙列武遂秦

分寶珪世胄雕戈舊勲名稱實賓言謂身文朝傾地鎮
夜落台星石壇承祀豐碑頌靈渭城高柏昌陵下亭須
知地布為讀山銘

墓誌梁王僧孺豫州墓誌曰自姬發系因魏傳緒留路
在趙名賢世襲相秦將漢英雄係踵忘寵辱無愠喜靡
矜夸慎嗜欲其行軍用武勲合竒正乃治邊御衆威裕
兼行常懍懍然以中原為己任或欲十萬而橫行乍思
五千而深入尅反舊京飲馬函渭然後高臥閒帷晤言

空谷思魯連之辭賞慕田疇之高蹈而火傳川逝長塗
已迫雖景鍾良史有功必書刻板鏤石宜兼不朽銘曰
高勲藹藹長旌高旆入作爪牙出司襟帶民謠不息王
言有會功為上等政稱九最日隆寵秩方登遠大義轡
難留濛水易收秘邱玄戶杳杳悠悠

陳徐陵裴使君墓誌銘曰君五音之候兼其方牧八陣
之圖窮其巧變用能戰必勝攻必取督稱無難兵號解
煩朝飛火箭夜聳雲梯燧象從奔聯狼已合於是厥顏

不撓極咤諸戎寵德高聲肆言羣逆胡夷摠至猶持子
路之纓鋒刃相交終荷溫生之節每以財輕簞籜義重
蒿衡割宅字貧友之孤開門延故人之殯篤好朋遊居
常滿席每至鮮雲藹藹披王安之衣明月團團似班姬
之扇日帶花以如笑風鳴條而若歌傷列絲桐對揚文
酒一石之後逾能斷獄五斗之量猶未解醒嗟乎潘岳
之詩致哀周密莊公之誄用愍縣賁

陳江摠廣州刺史歐陽頎墓誌曰公家習尚書少府儒

高於漢冊世居渤海太守文重乎晉原中原喪亂避地
南徙公孝敬純深友悌敦睦家積遺財並讓諸季兼賙
同壤公含章內映遠識沈通室嗜欲謹言行資貞幹事
廉隅梁室不造凶羯憑陵公被銳執兇有志匡復梁孝
元帝授散騎常侍東衡州刺史始興縣侯而犬戎弑逆
宗杜播遷陳纂揖讓攸歸高祖恩加惟舊橫使持節都
督南衡二十二州諸軍事廣州刺史進為開府儀同三
司山陽郡公進號征南將軍加鼓吹一部巫山遠曲喧

騎吹於日南芳樹清音肅軍容於海截追贈車騎將軍
司空公涉獵六經優游百氏寬徭省賦化百越之歸心
撫寒投醪感三軍之死力在室如賓寧慚屋漏不貪為
寶每畏人知殺青無兼兩之疑薏苡豈懷珠之謫如羊
如粟不改夷齊之心遺慶遺風方留豹產之德

表魏武帝領兗州牧表曰入司兵校出摠符任臣以累
葉受恩膺荷洪施不敢顧命是以將戈帥甲順天行誅
雖戮夷覆亡不暇臣愧以興隆之秩功無所執以偽假

實條不勝華竊感譏誚益以惟谷

梁簡文帝為武陵王讓揚州表曰臣延首青冥傾心紫府言非東里誠譬北辰而滔滔雲漢不被霈然之澤鬱鬱仙居方隔下臣之奏周任量力請因所陳明主理奪伏冀照許臣聞繫風捕影涉求之路靡階玉馬金舟過遠之資無託

南康王曾理讓湘州表曰絲言自天而忽委玉刻披雲而下墜浮舟千仞呂梁之惕已深摠轡萬尋懸車之懼

非淺

梁劉孝儀安成王讓江州表曰臣聞失晨之雞雖不忘
於改旦敗駕之馬終取忸於銜鑣臣昔牧淮岱皇風咫尺一變至道易以為政而亂政莫理美錦徒傷豈可復
宣六條闡化千里又曰臣聞六轡沃若不策玄黃之馬
九成輪奐無求擁腫之材何則跳踔之路已窮梁棟之
用斯闕

南平王讓徐州表曰竊以淮岱務殷事乖坐嘯枌榆望

重非可臥治臣繇頻枕席動移旬悔恒恐尺波易流寸
陰難保寧可復冒此寵膺茲恩榮

臨川王解揚州表曰臣自馳傳斗牛作牧淮海政刑兩
空璿璣六運既昧弛張之要尤慚大小之獄故以結詒
濡翼取愧能官每一進思無忘退食誠復恩私可憑而
彝倫難紊敢恃慈弘冒披心款乞解州任少弭素飧又
為鄱陽嗣王初讓雍州表曰臣大邦維屏既慚宗子之
詩思樂泮宮有缺僖公之頌特以周開元伯錫壤參墟

漢啓三陲分珪舊楚身私家慶摠集微躬擁部襟帶跨
制數州西距峽關南踰鄧塞雖復呼韓來朝橐街納質
二鹵尋戈四郊無警猶如王戎雅識羊祜尚義臣求諸
已無或宴安進思盡忠歸乎私謁

李揚州舅讓表曰人心彼此盡為敵國金柝夜警和門
晝閉加以淮水淼漫危同三坂懷山之勢已成為魚之
期可見若使身死可以益國城沒足用報恩雖葬魚鼈
其甘如薺政以朽耄無庸必負恩寄恥辱之甚非止老

臣

啓梁陸倕勅使行江州事啓曰封畛遐曠屢井奧實陸
海神臯偏屬茲境兼以茂親明德維翰作鎮宣述條教
匡贊盛猷自非問望兼弘寧可擢膺嘉舉

教齊謝朓為錄公拜揚州恩教曰昔召南分陝流甘棠
之德平陽好道深獄市之寄吾忝屬負荷任摠侯伯受
餞元戎作牧中甸此地五都雜會四方是則而向隅之
矜斯積納隍之歎猶繁興念下車無忘待旦有齊禮導

德致之仁壽弘漏網之寬申在宥之澤

梁簡文帝罷雍州恩教曰折以片言事關往聖寄之勿
擾傳彼昔賢故刻木不對畫獄無入吾自之雍矜懷圉
行幸得天無虐旱地歇怪蟲今軸車行塗舟艤且戒植
柳官渡尚或依然寄飯曹僖猶思恩宥况義化君民節
離寒暑憫茲岐路宜留惠澤

臨雍州原減民間資教曰誠欲投軀決堤曝身求雨九
伐方弘三驅未息後爨之憂兵家斯急師興之費日用

彌廣今春流既長艫舳爭前轉漕相追饋糧不闕義存
矜急無俟多費

臨雍州革貪惰教曰壯夫疲於擐甲匹婦勞於轉輸藜
藿難充轉死溝壑春蠶不暖寒肌冬收不周夏飽胡寧
斯忍復加哀削傷盜抵罪遂為十一之資金作贖刑翻
成潤屋之產

尹

應劭漢官儀曰河南尹所理周地也秦兼天下置三川守

洛陽尹也漢更名河南孝武皇帝增云太守世祖中興徙都雒陽改號為尹尹正也

王隱晉書曰樂廣為河南尹郡中多怪無敢數在廳事者唯廣處之

晉中興書曰晉太興元年改丹陽內史為丹陽尹又曰劉隗為長兼侍中出補丹陽尹隗雖在外而萬機秘密皆豫聞之

語林曰許玄度出都詣劉真長先不識至便造之一面

留連標劉貴略無造詣遂九十日一詣許語曰卿為不去家將成輕薄京尹

詩梁元帝去丹陽尹尹荊州詩曰驂駕乘駟馬謁帝朝承明分符蒞閩越終然慚勵精又曰副君垂獎矚仁慈穆且敦終朝陪北閣清夜侍西園降責深知已寧思食棊恩未嘗辭畫室誰忍去輶轅

梁蕭琛和元帝詩曰妙善有兼姿羣材成大廈奕奕工辭賦翩翩富文雅麗藻若龍雕洪才類河瀉案牘時多

暇優游閱典墳儒墨自玄解文史更區分平臺禮申穆
兔苑接卿雲軒蓋蔭馳道珠履忽成羣德音高下被英
聲遠近聞

梁徐勉和元帝詩曰敬愛良是賢謙恭實所務尊賢遺
道德重學嚴師傅六藝誠為敏三雍稱有裕覆被唯仁
義吐納必珪璋壯思如泉湧逸藻似雲翔夙有匡時調
早懷經世方留心在庶績厲精思治綱

表梁劉孝儀晉安王讓丹陽尹表曰臣聞盈尺徑寸易

取琢磨南箕北斗難為簸挹何則良工質美在器成珍
假名責實涉求必殆

梁邵陵王讓丹陽尹初表曰臣進非民譽退異宗英尸
居崇號已紊彝典况京兆五守西漢難追河南二尹東
京罕繼審已循涯自知莫可街談巷議尤見不勝

梁庾肩吾為南康王讓丹陽尹表曰臣聞劒鏤七星非
有司天之用簾圖五嶽寧識崇朝之雲是知策彼泥龍
不能令其逐日乘斯流馬安可使其奔電方今振鷺盈

庭白駒室谷惟帝念功惟明克允君子之國幸聞其讓
石門之水獲免於貪

序梁元帝丹陽尹傳序曰傳曰大夫受郡漢書曰尹者
正也及其用人實難授受廣漢和顏接下子高自輔經
術孫寶行嚴霜之誅袁安留冬日之愛自二京版蕩五
馬南渡固乃上燭天文下應地理爾其地勢可得而言
東以赤山為城臯南以長淮為伊洛北以鍾山為華阜
西以大江為黃河既變淮海為神州亦即丹陽為京尹

雖得人之盛頗愧前賢而所遇之深多用宰輔皇上受圖負宸寶歷惟新制禮以告成功作樂以彰治定豈直四三皇六五帝孕夏陶周而已哉若夫位以德叙德以位成每念忝蒞京河茲焉四載以入安石之門思勤王之政坐真長之室想清談之風求瘼餘晨頗多暇景今綴采英賢為丹陽尹傳

太守

漢書曰郡守秦官掌理其郡秩二千石景帝中元二年更

名太守又曰季布為河東太守孝文時人有言其賢名
欲以為御史大夫夫人又言其勇使酒至留邸一月罷布
曰臣待罪河東陛下無故召臣此人必有欺陛下者夫
以一人譽召臣一人毀去臣恐天下有識聞之以窺陛
下上曰河東吾股肱郡故特召君爾又曰文翁廬江人
少好學景帝末為蜀郡守修起學館於成都招下縣子
弟以為學官童子得教令吏民見而榮之由是大化蜀
地學京師者比齊魯焉又曰黃霸字次公為潁川太守

戶口歲增治為天下第一徵守京兆尹是時鳳皇神雀
數集郡國潁川尤多天子以霸治行終長者下詔賜爵
關內侯黃金百觔又曰哀帝時南郡多盜賊授蕭育為
太守上以育耆舊名臣乃以三公使車載育入殿中受
策加賜黃金二十觔育至南郡盜賊斷跡

韓子曰李悝為魏文侯上地守而欲民之善射乃下令
云民有狐疑之訟者令之射狗中之者勝不中者負民
皆習射日夜不休與秦戰大敗之以民之善射也

東觀漢記曰馮勤曾祖揚宣帝時為弘農太守生八男
皆典郡趙魏號為馮萬石又云趙熹字伯陽為平原太
守後青州大蝗入平原界輒死歲屢有年百姓歌之又
曰朱暉字文季再遷臨淮太守吏民畏愛為之歌曰強
直自遂南陽朱季吏畏其威民懷其惠又曰張堪字君
淑試守蜀郡太守遷漁陽太守開治稻田八千餘頃教
民種田百姓以殷富童謠歌云桑無附枝麥穗兩岐張
君為政樂不可支視事八年匈奴不敢犯塞又曰廉范

字叔度為蜀郡太守成都邑宇逼側舊制禁民夜作以
防火而更相隱蔽燒者日日相屬范乃毀削前令但嚴
使儲水百姓為便乃歌之云廉叔度來何暮不禁火民
安堵昔無襦今五袴又曰王阜為益州太守神馬四出
滇河中甘露降白鳥見連有瑞應世謂其用法平正寬
慈惠化所致

三輔決錄曰馬援誡兄子書龍伯高敦篤周慎口無擇
言吾愛之重之願汝曹效之世祖見援書即擢為零陵太

守在郡四年甚有治化

張璠漢書曰宋登字叔陽出為潁川太守市無二價路不拾遺病免卒於家汝陰人配社祀之

沈約宋書曰羊玄保為黃門郎善奕碁碁品第三太祖亦好奕數蒙引見與太祖賭郡戲勝以補宣城太守

詩宋謝靈運去永嘉郡詩曰野曠沙岸靜天高秋日明
憩石挹飛泉攀林蹇落英

梁簡文帝罷丹陽郡往與吏民別詩曰久歸從事麥非

留故吏錢柳栽今尚在棠陰君詎憐

梁沈約去東陽與吏民別詩曰微薄叨今幸忝荷非昔
期唐風豈異世欽明重在茲飾驂去關輔分竹入河淇
下車如昨日曳組忽彌朞霜載凋秋草風三動春旗無
以招臥轍寧望後相思

碑晉孫楚鴈門太守牽府君碑曰君體德允直才量高
潔明鑒達於世變弘毅足以致遠聿振鴻翼於衮塵之
表卓爾先覺於擬議之前遷鴈門太守教民耕戰聽斷

以情信賞必罰下服其命是以夷狄窘迫固知所安譬
秋枯之隕晨風激電之不及掩耳目也伐叛柔服威震
沙漠遺種遠迹萬里無煙烈烈君侯文武允崇少兼七
德翰飛撫戎名揚河朔威震漢中臨危運奇在難匪從
廻旌東麾撫司徐青截彼降賊海岱以平剖符千里為
國干城

晉孫綽潁州府君碑曰君天縱傑邁奇逸卓犖茂才亮
拔雅度恢廓通理遠鑒之識禮樂飾身之具固以足之

於天仞冠之於搢紳出匡南位功深於爵金龜三曜冲
懷再發道光古賢風改彫雋允可謂明德宏猷贊世之
偉器者矣矯矯秀姿卓卓英韻他人之高及肩而已邀
命有數託生皇代所忝之至人知其幸況在懷情而無
自識但親勤末效違離已及低徊房禁攀戀罔遺

表梁范雲除始興郡表曰臣被沐恩靈棲息榮幸貶貌
兢視挺襟軫慮徒並言蠡管之誠終沈螢爝之用不悟懸
景麗天通涇潤下月緒未交鎔光再鑠修鞠慙疑驩不

及抃且地鄰舊越甸分故楚厥壤惟腴實邦斯大將何
以再宣王猷陶奉惠渥

梁蕭子範為蔡令樽讓吳郡表曰全吳輿區地迫都輦
譬彼西京則扶風馮翊方之洛下則潁川河內自非時
雨之政解繩之才寧可奉共理之言承河潤之旨鄧攸
廉白廼著不留之歌賀劬沈靜猶致題門之責

陳徐陵為始興王讓琅琊二郡太守表曰甫離懷袖裁
脫綺紈適荷隆私使膺珪組執玉不起樞衣未勝自甘

泉通火細柳屯兵苟帶戎臣頗同疆場言瞻漢草廼曰
中州遙望胡桑已成邊郡誠復居藩體國應思馬駿之
功論地惟親宜慕蕭彰之勇

陳江摠為衡陽王讓吳郡表曰芝泥馳印發命開顏

關頴

之誠夏霜易實兢惶之至春冰可涉臨淄回軾即事何
取廣川無聲頗知自匹

教梁簡文帝復臨丹陽教曰昔越張脩猛用弘美績邊
延善政實著民謠吾冲弱寡能未明理道猥以庸薄作

守京河將恐五袴無謠兩岐難頌思立恩惠微宣風範
梁邱遲永嘉郡教曰貴郡控帶山海利兼水陸實東南
之沃壤一都之巨會而曝背拘牛屢空於畎畝績麻治
絲無聞於室巷其有耕灌不脩桑榆靡樹遨遊鄠里酣
酺卒歲越伍乖鄰流宕忘返才異相如而四壁獨立高
慚仲蔚而三徑没人雖謝文翁之正俗庶幾龔遂之移
風

梁任昉為齊竟陵王世子臨會稽郡教曰富室兼井前

史共蠹大姓侵威往哲攸嫉而權豪之族擅割林池勢
富之家專利山海至乃水稱峻巖巖我君后崇墉增仞
內通神明出符大順火焱崑岡神嶽崩潰蘭艾同燼玉
石俱碎哲人遭命哀有餘慨

碑桓宣城碑曰君器量高濬神明披朗商略雅俗隱括
真偽擢奇取異不軌常流固以準的當時擬議郭許矣
處身立朝不峻功名俯仰顯默之際優游可否之間迹
卑而道不污身屈而志不屑矣銘曰於穆我后稟茲純

與虛豁高暢蕭條邁上風任外舒卓鑒內朗神栖冲慎
形同俯仰將登槐棘宏振綱網令儀早徂德音永響

銘晉傅玄江夏任君銘曰君偉條承洪苗之高胄稟岐
嶷之上姿質美珪璋志邈雲霄景行足以作儀範柱石
足以慮安危弱冠而英名播乎遐邇拜江夏太守內平
五教外運六奇邦國乂安飄塵不作銘曰峩峩任君應
和秀生如山之峙如海之渟才行闡茂文武是經羣后
利德泊然弗營宜享景福光輔上京如何夙逝不延百

齡

宋傅亮故安城太守傳府君銘曰爰自漢季以及晉朝
高明遠德係軌于時貞風亮節流聲累葉君承世德之
芳流蕩二象之淑靈含章蘊粹佩蘭藉蕙韋帶飯蔬朝不
及夕不以棲遲改其間不以隱約回其操楊生所謂久
幽而不改隨和之德者其斯之謂歟棲心古烈擬踵前
脩淹留孔老宛然內求于言中倫庸行歸周神之聽之
匪明匪幽

章梁簡文帝為王規拜吳郡太守章曰臣今願歛衽後
思循牆所忝示山河而形勝顧浮橋而不見蒼鷹一遊
望仙掌而逮然方當駕吉祥之車入句吳之地驅緹扇
之馬撫奉德之鄉製錦何階玆絲方始

梁陸倕授潯陽太守章曰鏤冰雕脂不見大龍之象課
虛叩寂寧聞駕辯之音徒荷容蓋空班推擇不能使府
庭生梓橫閣誦經俯睨朱輜仰瞻繒蓋漏上嚴辦伏軾
多慚

表宋顏延之拜永嘉太守辭東宮表曰抗志絕操芟陸
謝芻代食賓士何獨匪民又為齊竟陵王世子臨會稽
郡表曰此郡歌風蹈雅既髣髴於淹中春誦夏絃實依
稀於河上頃者以來稍有訛替可推擇明經式寄儒職
使琢玉成器無爽昔談鑄金待價有符舊說

教梁陸倕未至潯陽郡教曰第五倫之臨會稽躬斬馬
草鄧伯道之莅吳郡自運家糧故能使吏作頌歌民胥
興詠太守薄德謬叨龜組竊願巴祗闇坐接客思匹吳

隱被絮對賓常藥自隨式瞻無遠單車入境竊所庶幾
舊須發民治道及戍邏榆樵採諸如此類一皆省息又
云太守家本諸生伏膺典紀光武靈臺之籍較涉根基
張華聚土之書略見庭戶貴郡圖載具存方策校以
山經參諸括象原野城寺宛在心目龍泉鶴嶺不易窮
登所撰郡圖可勿親用公孫陞戟既似井蛙延壽執戈
實同兒戲

令長

左傳曰子皮使尹何為邑子產曰少未知可否子皮曰使夫往而學焉夫亦愈知治矣子產曰不可人之愛人求利之也今吾子愛人則以政猶未能操刀而使割也其傷實多子之愛人傷之而已

晏子春秋曰景公使晏子為阿宰三年而毀聞於國公不悅召而免之晏謝曰嬰知過矣請復阿三年而譽必聞於國公召而賞之辭而不受公問其故對曰昔者嬰之所治當賞而今所以治當誅是故不敢受

說苑曰宓子賤治單父彈琴身不下堂單父治巫馬期亦治單父以星出以星入日夜不處以身親之而單父亦治巫馬期問其故宓子曰我之謂任人子之謂任力任力者勞任人者佚又曰晉平公問趙武曰中牟三國之股肱邯鄲之肩髀也寡人欲其良令也其令空誰使而可趙武曰邢子可公曰邢子非子之讎邪對曰私讎不入公門又問曰中府之令空誰使而可趙武曰臣子可故外舉不避讎內舉不避子

新序曰昔子奇年十八齊君使之治阿既行矣悔之使追之未到阿及之還之已到勿還也使者及之而不還君問其故對曰臣見所以共載者白首也夫以老者之智以少者決之必能治阿矣是以不還

史記曰西門豹為鄴令會長老問民所疾苦禁巫祝為河伯取民之女為婦鑿渠十二灌溉民田到今皆得水
利

漢書曰焦延壽字贛為小黃令以伺候先知姦邪盜賊

不得發愛養利民當遷三老官屬上書願留贛有詔許之又曰蕭育為茂陵令會課育第六而漆令郭舜殿見責問育為之請扶風怒曰君課第六裁自脫何暇為之左右及罷傳召茂陵令詣後曹當以職事對育徑出曹書佐隨牽育育按佩刀曰蕭育杜陵男子何能詣曹也遂趨出欲去官明旦詔召入拜為司隸校尉育過扶風府門官屬掾吏數百人拜謁車下又曰召信臣以明經甲科為郎出補穀陽令舉高第選上蔡長其治視民如

赤子所居見稱述

司馬彪續漢書曰牟融舉茂才為豐令視事三年政化
流行縣無獄訟吏畏而愛之治有異績為州郡最又曰
卓茂遷密令其治民舉善而教不能則勸口不出惡言
勞心憂念吏民知其有緩急以恩信待吏吏畏而愛之
不忍欺也元始中天下蝗河南二十縣蝗獨不入密界
督郵書言太守太守大怒自出案行密界中實然乃驚
又曰魯恭為中牟令導民以孝推誠而治建中初郡國

螟傷稼犬牙緣界不入中牟河南尹袁安疑其不實遣
仁恕掾肥親往察驗之恭隨行阡陌俱坐桑下有雉止
其傍有童兒親曰何不擊之兒曰雉方將雛親矍然而
起與恭訣曰所以來者欲察治之善惡爾今蟲不犯境
此一異也化及鳥獸此二異也豎子有仁心此三異也
久留徒擾賢者可還府以狀白安美其治以勵屬縣又
曰孔奮守姑臧長治有異道時天下擾亂河西獨安而
姑臧市日四合為河西富縣每前長居官數月輒致貲

產舊在姑臧積四歲財產不增奮素孝自來為長時供養至謹在姑臧唯母極膳妻子飲食但葱韭又曰祭彤除偃師長視事五年縣無盜賊州課第一遷襄贛令時盜賊抄剽彤到官誅姦猾縣界清靜詔書增秩一等賜縑百匹冊書勉勵又曰劉寵除東平陵令是時民俗奢泰寵到官躬儉訓民以禮上下有序都鄙有章視事數年以母病棄官歸百姓士女攀車距輪充塞道路車不得前乃輕服潛遁又曰劉陶為順陽長政化大行道不

拾遺以病去官童謠歌曰悵然不樂思我劉君何時復
來安此下民又曰虞詡為朝歌長故舊皆弔詡曰難者
不避易者不從不遇盤根錯節何以別其利器乎又曰
公孫述補清水長太守以其能使兼治五縣政事修理
姦盜不發郡中謂有神明又曰虞延除緡陽令每至歲
時伏臘休遣徒繫各使還家並感其恩應期歸有一囚
於家被病自載詣獄既至城門而死又曰董宣為洛陽
令寧平公主乳母奴白日殺人因匿主家吏不能得及

主出行以奴驂乘宣於大廈門亭候之乃駐車叩馬以刀畫地數主失者三叱奴下車格殺之主即馳車入宮上大怒召宣曰令欲死乎宣叩頭曰臣奉法之吏不敢縱法不欲死也上曰捶之宣曰願一言死無恨上曰何言宣曰陛下聖德中興而縱奴殺良民以奴殺臣臣死之後陛下何以治天下捶殺臣不如臣自殺即以頭撐楹流血被面上令小黃門持之曰癡令叩頭謝主宣不從上頓癡令頭宣兩手據地不肯低頭上敕強項令出詣

太官賜食又曰鄭弘為縣令政化大行民王逢得路遺
寶物懸於衢道求主還之又曰胡紹為河內懷令三日
一視事十日一詣倉俸米於閤外炊作乾飯食之不設
釜竈得一彊盜問其黨與得數百人皆誅之政教清平
為三河表又曰劉昆除江陵令時縣連火災昆輒向火
叩頭多能降雨止風

益部耆舊傳曰閭憲為綿竹令有男子杜成夜行於路
得遺裝開視有錦二十疋明早送詣吏曰縣有明府君

犯此則慚

風俗通曰俗說孝明帝時尚書郎河東王喬遷為鄴令
喬有神術每月朔嘗詣臺朝明帝怪其來數而無車騎
密令太子史候望言臨至時常有雙鳧從東南來因伏
伺見鳧舉羅得一隻鳧使尚方識視四年中所賜尚書
郎屬履也

魯國先賢傳曰孔翊為洛陽令置水庭前得囑托書皆
投水中一無所發

詩晉潘岳懷縣詩曰小國寡人民終日寂無事白水過
庭激綠槐夾門植信美非吾土祇攪懷歸志眷然顧羣
洛山川邈離異願言還舊鄉畏此簡書忌

晉河陽令潘安仁詩曰宓生化單父子奇蒞東阿桐鄉
建奇勲武城播弦歌逸驥騰夷路潛龍躍海波弱冠步
鼎銘既立宰三河徒美天安茂豈謂人爵多

陳陰鏗罷故章縣詩曰秩滿三秋暮舟虛一水濱漫漫
遵歸道悽悽對別津晨風下散葉岐路起飛塵長岑舊

知遠萊蕪本自貧敝裏恒容吏正朝不繫民唯當有一
鹿留持贈後人

頌後漢蔡邕陳留太守行小黃縣頌曰太皞為政建時
春陽我君勸止戾茲小黃濟濟羣吏攝齊升堂乃訓乃
厲示之憲方原罪以心察獄以情欽于刑濫惟務求輕
有辜小罪放死從生元化洽矣黔首用寧惟以作頌式
昭德聲又考城縣頌曰曖曖玄路北至考城勸茲穡民
東作是營農桑之業為國之經我君勤心德音邈成率

爾苗民慎不敬聽女執伊籬男執其耕申戒羣僚務在
寬平罪人赦宥囹圄用清

晉江偉襄邑令傳渾頌曰君稟二儀之醇粹履元亨之
貞和比德金玉而堅白不磨自處戶庭而名稱家邦不
出門庭而聲播諸華矣弱冠而應式叙起家而君斯民
其為政也同勵秋霜等惠春仁刑不濫踈賞不僭親儀
天地之簡易則大道之清純是以其道易行其教易遵
也凡我士民襁老攜幼惴惴而懷君之恩顒顒而戀君

之德相與援衡軒而雨涕若赤子於父母也明明君侯
臨下有赫克隆有光惠我咫尺于以具瞻有觀其宅乃
冰其清乃玉其白風抗其高雲垂其澤宛荆未清淮夷
孔熾春日萋萋我車既備光光我君爰登其司微微襄
魯有垆斯記君有遺愛民有餘思敢揚斯頌垂之來志
贊晉孫綽孔松楊象贊曰君德器純固基宇高邃荆玉
不及喻其溫南金未能方其勵夫其溫恭篤誠善誘勤
勸外身崇物菲躬厚人指撝必謙動靜克讓允有古賢

之流風乃祖之遺令矣肇階方尺臨政弊邑潔齊冬冰
澤侔春露於穆我后含和體純行範乃祖德冠搢紳降
迹垂化澤侔三春超然遐舉遺愛在民

頌孫楚梁令孫侯頌曰於穆君侯英才宣朗神鑒將來
思通既往受佐陝西臨我邦壤聲之所振下應如響明
斷決疑易於指掌野有寇盜惟侯屏之我有田疇惟侯
闢之古人慎獄惟侯平之凡此三惠如何勿思

啓梁任孝恭辭縣啓曰但以執笏丹墀累飛庭葉垂纓

禁裏屢改欄花顧慕階墀不願違奉下使戀主之心施
於犬馬傾日之志偏在葵藿

梁劉孝儀除建康令謝啓曰所恐長安少年易為操彈
渭城游徼矜其獨勇清路道奴固知難摺輕綏飛駕且
見為榮

藝文類聚卷五十